

20-10-2024

Morning Dogri (NSD)

National News

1. प्रधानमंत्री नरेन्द्र मोदी होर अज्ज वाराणसी थमां 6 ज्हार 100 करोड़ रपे दी लागत आलिं विकास परियोजनाएं दी शुरूआत करगंन।
2. सरकार बागवानी उत्पादें दी कीमते ते खुदरा लागत बश्कार असमानता गी दूर करने लेई इक कमेटी दा गठन करोग।
3. केन्द्री रेलवे नै देयाली ते छठ पूजा गी ध्यानै च रखदे होई 570 विशेष रेलगड्डियां चलाने दा फैसला लैता ऐ।
4. पाकिस्तान च अल्पसंख्यकें पर होने आलिं जुल्म ज्यादतिं गी लेइयै संयुक्त राष्ट्र मनुक्खी अधिकार संगठन दी रिपोर्ट च गैहरी चिंता प्रगट कीती गई ऐ।
5. महिला टी-20 क्रिकेट विश्व कप दे फाइनल च अज्ज न्यूजीलैंड दा मकाबला दक्खन अफ्रीका कन्ने होग।



PM Varanasi

प्रधानमंत्री नरेन्द्र मोदी होर अज्ज अपने संसदी हल्के वाराणसी दा दौरा लाडन ते तकरीबन 6 ज्हार 100 करोड़ रपे दी लागत आलिं परियोजनाएं दा उद्घाटन करडन। श्री मोदी होर दपैहरी 2 बजे काशी पुज्जडन ते उत्थे आर.जे. शंकरा अक्खीं दे अस्पताल दा उद्घाटन करडन। एह्दे मगरा संजा तकरीबन सवा 4 बजे ओह वाराणसी दे सिगरा स्टेडियम च नेकां विकास परियोजना दा उद्घाटन ते नीह पत्थर रक्खडन। आर.जे. शंकरा अस्पताल च अक्खिं दिं बक्ख-बक्ख बमारिं ताई व्यापक सलाह-मशवरे ते ईलाज दी सहूलत थहोग। इस मौके उप्पर प्रधानमंत्री होर लोकें गी संबोधत बी करगंन। संपर्क गी बढ़ावा देने आली अपनी वचनबद्धता मताबक मोदी होर लाल बहादुर शास्त्री अंतर्राष्ट्री ब्हाई अड्डा वाराणसी दे रनवे दे विस्तार ते नमीं टर्मिनल ईमारत दे निर्माण आस्तै तकरीबन 2 ज्हार 870 करोड़ दी लागत कन्ने सरबंधत कम्में दा नीह पत्थर रक्खगंन। ओह आगरा, दरभंगा ते बागडोगरा ब्हाई अड्डे पर नमें सिविल एन्कलेव लेई बी नीह पत्थर रक्खडन।



Agriculture

केन्द्री मंत्री शिवराज सिंह चौहान होरें आखेआ ऐ जे सरकार राई-बाई पैदावार दिं कीमतें ते बागवानी उत्पादें दी परचून लागत बश्कार बड़ी मती फर्कोफर्की गी दूर करने लेई इक कमेटी खडेरोग। नमीं दिल्ली च इक कृषि सम्मेलन गी संबोधत करदे होई श्री सिंह होरें आखेआ जे जित्थें करसान 5 रपे फही किलो साबू अपनियां सब्जियां बेचदे न उत्थें गै गाहकें गी 50 रपे दा भुगतान करना पौंदा ऐ। इस फर्क गी घट्ट करने दी लोड़ ऐ। श्री चौहान होरें अगले म्हीने थमां कृषि चौपाल शुरू करने दी योजना दा बी खुलासा कीता। उनें आईसीएआर, यूनिवर्सिटीं ते राज्य सरकारें सनें बक्ख-बक्ख प्राधिकरणें तैहत उंदे खंडत प्रबंधन बारे चैतां गी उजागर करदे होई समूलचे भारत च 730 शा बद्ध कृषि विज्ञान केन्द्रें दे कम्मकाज गी सुचारू करने दी लोड़ पर जोर दित्ता। श्री चौहान होरें आखेआ जे राई-बाई भारत दी आर्थिक रीड ऐ ते इस क्षेत्र गी मजबूत कीते बिजन कोई तरक्की मुमकिन नैई होई सकदी।



Rail Special

औंदे ध्यार देयाली ते छठ पूजा पर उत्तरी तेपूर्वी राज्येंदी यात्रा करने आले यात्रुएं दी भीड़ गी ध्यानै च रखदे होई मध्य रेलवे नै मुंबई, पुणे ते नागपुर सनें महाराष्ट्र दिएं बक्ख-बक्ख थाहरें थमां कुल 570 टकोहदियां रेलगड्डियां चलाने दा ऐलान कीता ऐ। इंदे अलावा 108 रेलों मध्य रेलवे आस्सेआ लातूर, सांवतवाडी रोड, नागपुर, पुणे, कोल्हापुर, नांदेड ते महाराष्ट्र दिएं दूइएं थाहरें दी यात्रा करने आले यात्रुएं आस्तै चलाइयां जा'रदियां न। उत्तर बक्खी जाने आले यात्रुएं लेई मध्य रेलवे दानापुर, छपरा, गौरखपुर, बनारस, समस्तीपुर, आसनसोल, अगरतला, संतरागाशी ते होर दुइयां थाहरें लेई 378 रेलों चलाइयां जा'रदियां न। दक्खन दे यात्रुएं लेई करीमनगर, कोचुवेली, काजीपेट, बेंगलुरु लेई रेलवे 84 रेलगड्डियां चला'रदा ऐ। यात्री इनें रेलें दा समें www.enquiry.indianrail.gov.in परा हासल करी सकदे न ते एनटीईएस परा बी जानकारी गी डाउनलोड कीती जाई सकी दी ऐ।



Bandi Sanjay

केन्द्री गृहमंत्री बंडी संजय कुमार होरें गी तेलंगाना लोक सेवा आयोग गुन-1 सेवा दे मेदवारें दे हक्कै च विरोध प्रदर्शन करने लेई हैदराबाद च तेलंगाना पुलस नै हिरासतै च लैता ऐ। एह मेदवार भर्ती आली प्रक्रिया ते आरक्षण पर किश सरकारी हुक्मै दे प्रभाव पर चैता जतांदे होई मुख् मतेयान गी स्थगित करने दी मंग करा करदे न। कल प्रदर्शन करा'रदे मेदवारें कन्नै मिलने परैंत श्री कुमार होरें मुख्मंत्री रेवंत रेड्डी हुंदे कन्नै मिलने ते मेदवारें दिएं चैताएं कन्नै अवगत करोआने लेई "चलो सचिवालय" रैली कड्डी। जिस दरान उनें पुलस पर रौह रोस्सा प्रगट कीता ते इस गल्ला पर जोर पाया जे ओह नौकरी दे ख्वाइशमंद मेदवारें दी शकैतें बारे दिंदे मुख्मंत्री हुंदे कन्नै गल्लबात करना चांहदे न। एहदे मगरा पुलस नै उनेंगी हिरासतै च लेई लैता ऐ। सचिवालय थमां तकरीबन 3 किलोमीटर दूर नामपल्ली च राज्य बीजेपी कार्यालय च छोड़ी दित्ता।



Speaker Oath

उपराज्यपाल मनोज सिन्हा होरें सीनियर नेशनल कांफ्रेंस नेता मुबारक गुल होरें गी जम्मू-कश्मीर विधानसभा दे अंतरिम स्पीकर दी सगंध चुकाई। मुबारक गुल होरें श्रीनगर दी ईदगाह सीट थमां चुनां जित्तेआ ऐ। राजभवन श्रीनगर च कल इक समारोह च उनेंगी सगंध चकाई गई। मुख्मंत्री उमर अब्दुल्ला, उपमुख्मंत्री सुरिंद्र चौधरी ते कैबिनेट मंत्री सकीना इत्तू, जावेद डार, जावेद राणा ते सतीश शर्मा होर इस मौके पर मौजूद हे। मुबारक गुल होर नमें चुनोए दे विधानसभा मैम्बरें गी कल संगारे सगंध चुकाडन।



UN Human Rights

संयुक्त राष्ट्र दी मनुक्खी अधिकारें सरबंधी कमेटी आसेआ दित्ती गेदी ब्यौरेवार रिपोर्ट नै पाकिस्तान च धार्मिक अरनीकता, जबरन अगवाईएं, ते हिंदी ते ईसाई धर्म दिएं कुड़िएं दा जबरन धर्म बदलने सने मीडिया पर बंदिशें ते अभिव्यक्ति दी आजादी गी लेइयै गंभीर चैतां पैदा करी दित्तिआं न। संयुक्त राष्ट्र दी इस कमेटी नै शिया मुसलमानें, ईसाईएं, अहमदिया, हिंदुएं ते सिक्खें पर हमलें दी गिनतरी च लगातार होआ करदे बाददे पर पाकिस्तानी सरकार दी नाकामी गी लेइयै बी सोआल पुट्टे न।



Assam Cyber

साईबर अपराधें कन्नै निबडने लेई असम च इक राष्ट्रीय फोरेंसिक प्रयोगशाला स्थापत कीती जाग। सीआईडी दे अतिरिक्त महानिदेशक मुन्ना प्रसाद गुप्ता होरें दस्सेआ जे इस बक्खी इक समझौते पर दस्तखत होई गेदे न। गृह मंत्रालय इस संस्थान लेई लोडचदी जरूरी सहायता प्रदान करै करदा ऐ। श्री गुप्ता होरें आखेआ जे असम पुलस नै साइबर अपराधें दे खतरे गी रोकने लेई केई बड्डियां गैई पुट्टियां न। पुलस स्टेशनें गी

जरूरी साइबर उपकरण प्रदान कीते गे न ते पुलस कर्मिं गी सिखलाई बी दित्ती गई ऐ। उनें अगगे आखेआ जे पुलस राज्य च साइबर अपराधें दे बारे च बड्डे पैमाने पर जागरूकता बी फैला करदी ऐ।



Army Road Safety

भारतीय फौज दी बाइसन डिवीजन नै सड़क सुरक्षा दे बक्ख-बक्ख पैह्लुएं दे बारे च जागरूकता बधाने ते फौजी ते प्राइवेट दौनें किस्मै दिएं गड्डिं दे पेश होने आले हादसें गी रोकने लेई हैदराबाद च तेलंगाना राज्य पुलस कन्नै रलियै इक सड़क सुरक्षा कॉन्क्लेव दा सरिस्ता कीता। इस मौके पर हादसें गी रोकने लेई गड्डिं च नमीं तकनीक दा इस्तेमाल, गड्डी चलांदे लै होने आली थकावट गी घट्ट करने सनें ट्रैफिक जागरूकता कन्नै जुड़े दे बक्ख-बक्ख विषय पर इक नमैश दा बी सरिस्ता कीता गेआ हा। दऊं दिनें दे इस सम्मेलन च खरे ट्रैफिक कनूनें ते कन्नो कन्नी सड़क नियमें दे महत्वै पर लोह पाई गई। ध्यानजोग ऐ जे हर ब'रे भारत च सड़क हादसें च गै 2 लक्ख कोला मते लोकें दी मौत होई जंदी ऐ।



Women T-20

दुबई च महिला टी-20 क्रिकेट विश्व कप दे फाइनल च अज्ज न्यूजीलैंड दा मकाबला दक्खन अफ्रीका कन्नै होग। सैमीफाइनल च दक्खन अफ्रीका नै पिछली बारी दी चैंपियन आस्ट्रेलिया गी हराइयै उपरोतली दूई बारी फाइनल च प्रवेश कीता ऐ। 2016 दे बाद इस प्रतियोगिता च पैहली बारी कोई नमां जेतू खताब अपने नां करोग।



Kashmir Marathon

मुख्यमंत्री ओमर अब्दुल्ला ते बॉलीवुड दे कलाकार सुनील शेटी होरें अज्ज कश्मीर मैराथन द्रौड़ गी सांझे तौर पर शुरू करोआया। इस आयोजन च देश-विदेश थमां एथलीट हिस्सा लै करदे न। इस मौके पर बोलदे होई सुनील शेटी होरें कश्मीर दी सराहना कीती ते आखेआ जे उत्थे बड़ा शानदार म्हौल ऐ। उनें आखेआ जे सुरगै ज्नेई इस घरती पर आयोजित होआ करदी मैराथन द्रौड़ च शामिल होना, एथलीटें लेई केई मायनें च खास ऐ। उनें मेद जाहर कीती जे कश्मीर ऐसी थाहर बनै जित्थे हर ब'रे लोक मते चाएं-चाएं औना पसंद करन। मुख्यमंत्री ओमर अब्दुल्ला होर बी इस मैराथन द्रौड़ च शामिल होए ते एथलीटें दा दिल बघाया। इस मैराथन दे आयोजन दा मकसद, पूरी दुनिया गी एह दस्सना ऐ जे कश्मीर च हुन हालात बडे मते सुधरी चुके दे न। इस आयोजन च 13 मुख्खें दे 59 एथलीटें सने भारत दे बक्ख-बक्ख राज्यें थमां बी मन्ने-परमन्ने दे एथलीट हिस्सा लै करदे न। इनें एथलीटें दी सुरक्षा जकीनी बनाने दे मकसद कन्नै पोलो व्यु थाहरै पर 20एं बिस्तरें आह्ला इक मेडिकल कैंप खड्डेरेया गेदा ऐ।



Cricket

बेंगलुरु दे एम.चिन्नास्वामी स्टेडियम च भारत ते न्यूजीलैंड बश्कार खेड्डे जा'रदे पैहले क्रिकेट टैस्ट मैच दे 5में ध्याड़े अज्ज न्यूजीलैंड अपनी दूई पारी दी शुरूआत करोग। एहदे शा पैहले भारत नै कल दूई पारी च 462 रंज बनाए। पैहली पारी च भारतीय टीम शडे 46 रंज गै बनाई सकी ऐ।



Army Mendhar

फौज नै हाल च गै पुंछ दे मेंढर इलाके दे पहाड़ी मैदान च इक एथलैटिक मीट दा आयोजन कीता ऐ, जेहदा मकसद मकामी नोजवानें गी सशक्त बनाना ते पीर पंजाल खेत्तर च खेड्डें गी बढ़ावा देना ऐ। एह आयोजन ना छड़ा एथलैटिक हुनर गी प्रदर्शित करने दा इक मंच गै नेई सगुआं युवा पीढ़ी गी शारीरिक गतिविधिएं ते खेड्डें आली बक्खी बढ़ावा देने लेई बड्डी पैह्लकदमी बी ऐ। इस एथलैटिक मीट च 100 थमां बद्ध प्रतिभागिएं हिस्सा लैता। एहदे च मती गिनतरी च कुड़िं बी शामिल हियां जेहछी भारतीय फौज दी खेड्डें प्रति प्रतिबद्धता गी दर्शादी ऐ।

